

MOJA, TVOJA
**NAŠA
ZEMLJA**
★★★★★

RAZVIJAJUĆI KULTURU, GRADIMO ZDRAVO DRUŠTVO

**NAŠA
STRANKA**

Kultura je kapital Bosne i Hercegovine. Svoju prepoznatljivost po umjetničkom i kulturnom stvaralaštvu i baštini Bosna i Hercegovina i danas dograđuje izvanrednim dosezima svojih umjetnika i kulturnih radnika. Nažalost, ovi rezultati se dosežu ne zahvaljujući, nego unatoč odnosu administracije. Do sada je kulturna djelatnost bila na margini društvenog interesa, te je umjesto ulaganja dobijala pomoć: time je bila obesnažena, osuđena na improvizaciju i na ograničeni doseg. U uvjerenju da kultura treba da ima centralni status, Naša stranka želi da postane partner djelatnicima na polju kulture i radi na stvaranju uslova da svoj potencijal ostvare u punom kapacitetu. Naša stranka prepoznaje da kultura ne troši nego stvara i da je ulaganje u kulturu investicija u vrijednost koja društvu ostaje i od koje društvo ima višestruke dobrobiti.

Kultura je osnovna ljudska potreba, a stanovnici BiH su tome svjedoci. U opsjednutom Sarajevu je za četiri godine realizirano preko 2000 umjetničkih događaja – koncerata, izložbi, predstava, a kulturno naslijeđe je branjeno ravnopravno s ljudskim životima. Publika je svoje pravo na kulturu branila čak i u situaciji najveće opasnosti. Ova potreba u bosanskohercegovačkom društvu mora biti prepoznata, a njena snaga treba biti putokaz da se stvaraocima umjetnosti i kulture i njenoj publici mora obezbijediti dostojanstveno djelovanje, svakodnevno prisutno u životu svih građana, a posebno mladih.

Budućnost otvorenog, osviještenog, empatijskog, kosmopolitskog, osnaženog, građanskog bosanskohercegovačkog društva možemo ostvariti samo sa snažnim kulturnim sektorom.

Zbog toga Naša stranka iskazuje opredjeljenje prema razvoju kulture kao području centralnog interesa i mi smatramo:

- Da je kultura osnovna ljudska potreba i osnovno ljudsko pravo, te da joj svi građani moraju imati pristup,
- Da je kultura vrijednost koja čini naš identitet. Obaveza je da zaštitimo stvaranje u umjetnosti i kulturi i da podstičemo kreiranje novog naslijeđa za buduće generacije,
- Da je kultura domen u kojem bilježimo svijest i znanje o sebi,
- Da je kultura prostor u kojem saznajemo o drugom. Kroz kulturu stvaramo svoj multikulturni identitet, negujemo empatiju prema manjinama i drugačijima,
- Da je kultura naše ogledalo i most prema vani. Zbog toga težimo međunarodnoj relevantnosti naše umjetničke i kulturne produkcije,
- Da kultura ima ogroman razvojni potencijal koji prepoznajemo kroz razvoj javnog prostora,
- Da kulturnu historiju stvaraju umjetnici, te da zbog toga moraju biti prepoznati, zaštićeni i podržani,
- Da kultura ima veliki potencijal da bude generator ekonomskog razvoja,
- Da kulturna produkcija mora imati adekvatne uslove za djelovanje,
- Da je umjetničko i kreativno izražavanje dio slobode izražavanja u društvu, te da zbog toga umjetnici moraju biti zaštićeni od cenzure i bilo kakvog oblika pritiska ili zastrašivanja. Također, umjetnici moraju imati i materijalnu sigurnost kako bi mogli biti rasterećeni pritiska prilikom izražavanja.

Pozivajući se na navedene principe Naša stranka predlaže sljedeće mjere:

- Sistemsko prepoznavanje uloge kulture kao centralne društvene vrijednosti. Strateškim planiranjem i osiguravanjem većeg budžetskog udjela ćemo osigurati centralnu poziciju kulturi kao generatoru razvoja,
- Revizija i restrukturiranje sistema finansiranja kulture iz javnih izvora. Moramo odvojiti grantove po sektorima/djelatnostima, napraviti razgraničenje između komercijalnih i nekomercijalnih oblika kulture i postaviti stručne komisije koje će vršiti evaluaciju prijave i odobravanje finansiranja,
- Revizija i unapređenje sistema upravljanja kulturom u javnom sektoru. Upravljačke strukture moraju biti sastavljene od eksperata u oblastima relevantnim za njihovo djelovanje. Također, potrebno je uspostaviti kantonalne savjete za kulturu koje će činiti najistaknutiji djelatnici u oblasti kulture,
- Poticanje djelovanja nezavisnog sektora kao nosioca projekata od najvišeg značaja u kulturi u BiH. Potrebna je strateška podrška organizacijama i pojedincima. Pored redovnih, potrebno je uspostaviti strateške grantove za podršku razvoja nezavisnog sektora i višegodišnjih grantova kao osnove za planiranje razvoja i aktivnosti,
- Razvijanje programa za podršku aktivnosti mladih u kulturi. Želimo da mladi kroz projekte stipendiranja, podršku za odlazak na festivale, majstorske radionice imaju priliku za istraživanje i izgradnju. Potrebno je provesti plansku integraciju umjetnosti u obrazovni sistem, stimularati osnivanje kino klubova, horova, muzičkih ansambala po školama,

- Pojačat ćemo fokus na zaštitu kulturno-historijskog naslijeđa. Svjedočimo svakodnevnom uništavanju i zapuštanju već proglašениh nacionalnih spomenika. Potrebno je donijeti zakon o kulturnoj baštini kojim ćemo razviti sve potrebne metode zaštite, od nadležne institucije, izrade baza podataka, arheoloških istraživanja, digitalizacije građe, kao i osmisliti modele finansiranja,
- Moramo podržati razvoj umjetnosti kao prostora stvaranja novog kulturnog naslijeđa. Namjenskim grantovima ćemo stimulisati stvaranje i osiguravati otkup originalnih umjetničkih djela,
- Podrška internacionalizaciji bosanskohercegovačke kulture. Potrebno je podržavati regionalno i internacionalno umrežavanje, odvajati sredstva za mobilnost bh. umjetnika i kulturnih radnika (festivali, sajmovi, turneje), te poticati prevođenje naših djela na strane jezike,
- Decentralizacija i njegovanje različitosti u kulturnoj produkciji. Moramo osigurati široku dostupnost kulturi, njegovanje kulture u zajednici i participaciju građana u kulturnoj produkciji kroz sistemsku pomoću radu domova kulture i drugih institucija,
- Izgradnja nove i obnavljanje stare kulturne infrastrukture je jedan od neospornih prioriteta našeg djelovanja. Izgradnja objekata kao što je Muzej Ars Aevi, Muzej Holokausta, koncertne dvorane i drugih, uz nužnu sanaciju postojećih objekata se pod hitno mora pokrenuti.